

БОСНА И ХЕРЦЕГОВИНА
ПАРЛАМЕНТАРНА СКУПШТИНА
БОСНЕ И ХЕРЦЕГОВИНЕ

СЕКРЕТАРИЈАТ
ЗАЈЕДНИЧКА СЛУЖБА

Сектор за међународне односе и протокол



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE

SEKRETARIJAT / TAJNIŠTVO
ZAJEDNIČKA SLUŽBA

Sektor za međunarodne односе i protokol

Broj: 01,03,03/11-05-1-813/24
Sarajevo, 7. 5. 2024.

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

KOLEGIJ PREDSTAVNIČKOG DOMA PSBiH

PRIMLJENO:			
Organizaciona jedinica	Klasifikaciona oznaka	Redni broj	Broj priloga
		01.05.2024	

Predmet: Izvještaj sa Šestog svjetskog foruma za međukulturalni dijalog: "Dijalog za mir i globalnu sigurnost: saradnja i međusobna povezanost", održanog u Bakuu, Azerbejdžan, 1. 5 – 3. 5. 2024.

Poslanik Nihad Omerović, član Predstavničkog doma Parlamentarne skupštine BiH, učestvovao je u radu 6. svjetskog foruma za međukulturalni dijalog, koji je održan u Bakuu od 1. do 3. maja 2024. godine.

Ovaj 6. forum „Dijalog za mir i globalnu sigurnost: saradnja i međusobna povezanost“ poslužio je kao jedinstvena i važna platforma za međunarodne organizacije, istaknute lidere i uvažene praktičare da se uključe u smislen diskurs o hitnim globalnim pitanjima koja prevazilaze nacionalne granice. Fokus ovogodišnje teme Foruma bio je na ključnoj ulozi međukulturalnog razumijevanja i zajedničkih napora u rješavanju složenih izazova u oblasti mira i globalne sigurnosti, očuvanja kulturnog naslijeđa, kulturnih i turističkih ruta, međuvjerskog dijaloga, klimatskih promjena, mira za kulturu, ilegalne migracije, vještačke inteligencije i mnogih drugih značajnih pitanja. Učesnici 6. svjetskog foruma o međukulturalnom dijalogu imali su priliku da u okviru panel-rasprava razmijene mišljenja, stavove i iskustva u vezi s brojnim pitanjima, poput uloge obrazovanja i angažmana omladine u suzbijanju ksenofobije, diskriminacije i sprečavanja zločina iz mržnje, pitanja migracija i njihovog društvenog uticaja, kao i prijetnji po međunarodnu sigurnost, uloge žena i njihovih prava u jačanju multikulturalnog dijaloga, izgradnje povjerenja kroz međuvjerski dijalog, te pitanja vještačke inteligencije kao prilike ili prijetnje ljudskoj kulturi i civilizaciji.

Nihad Omerović se drugog dana Foruma obratio učesnicima ovog globalnog događaja, gdje je govorio o potrebi uspostavljanja i promoviranja međukulturalnog i međureligijskog dijaloga u multietničkim društvima. Čestitajući na uspješnoj organizaciji Foruma, Omerović je kazao da se, u današnjem vremenu izraženih ratnih sukoba, stalnih prijetnji novim sukobima, prisutnih napetosti na većem broju teritorija koje posjeduju bogatstvo multikulturalnosti i multietničnosti, aktivni i sistemski međukulturalni dijalog javlja kao primarna potreba te da diskriminacija, netolerancija, nizak stepen društvene, kulturne, naučne i vjerske svijesti, te zloupotreba vjerske ili etničke pripadnosti predstavljaju ključne probleme u procesu međukulturalnog dijaloga. Dalje je u svom obraćanju istaknuo da bi ključne

aktivnosti svih tijela vlasti, kao i nevladinog sektora, s ciljem promjene negativnog trenda kada je riječ o zaštiti osnovnih ljudskih sloboda, socijalnih, etničkih, vjerskih i nacionalnih prava manjinskih grupa, trebale da budu promocija međukulturalnog dijaloga, zaštita i jačanje ljudskih prava, uspostavljanje efikasnih demokratskih procesa, kao i stvaranje zakonodavnih mehanizama koji osiguravaju vladavinu prava, te postizanje čvrste integracije i kohezije u društvu.

Poslanik Omerović istaknuo je važnost međukulturalnog dijaloga u vjerskom kontekstu, te je poručio da je potrebno imati u vidu univerzalnu i bezvremensku vrijednost da „drugom i drugačijem ne smijemo činiti što ne bi činili sebi“, te da se svi skupa moramo boriti za promoviranje univerzalnih pozitivnih vrijednosti koje su identične za sve vjere, sve kulture i sve nacije te naveo primjer Bosne i Hercegovine, države s viševjekovnom multietničkom i multikulturalnom historijom koja pokazuje da, koliko god bile jake sile zla, borba za slobodu, utemeljena na principima jednakosti i ravnopravnosti, uvijek pobjeđuje. Na kraju svog obraćanja učesnicima 6. svjetskog foruma o međukulturalnom dijalogu u Bakuu poslanik Omerović poručio je da se samo na principu istinske ravnopravnosti može graditi trajni globalni mir, te sigurno i prosperitetno društvo.

Poslanik Omerović dao je izjavu za brojne novinarske ekipe koje su pratile ovaj globalni skup, gdje je ocijenio da se važnost ovog foruma ogleda u potenciranju potrebe uspostavljanja aktivnijeg međukulturalnog dijaloga. Dodatno je naglasio da međukulturalni dijalog omogućava da na konstruktivan i demokratski način pridemo različitim identitetima na osnovu univerzalnih vrijednosti koje dijelimo - jednakost, nacionalne, vjerske i sve druge slobode. Samo kroz pragmatično djelovanje ključnih aktera – državnih lidera, parlamentaraca, vjerskih lidera, akademske zajednice, kulturnih zajednica, migrantskih zajednica i nevladinog sektora - možemo spriječiti etničke, vjerske, jezičke i kulturne podjele, te postići veći stepen međuetničkog dijaloga i razumijevanja.

Poslanik u Predstavničkom domu Parlamentarne skupštine BiH Nihad Omerović susreo se u Bakuu, na marginama 6. svjetskog foruma o međukulturalnom dijalogu, s generalnom sekretarkom Međunarodnog parlamentarnog kongresa (IPC) Sitarom Ayaz. Prilikom susreta s dugogodišnjom senatorkom Pakistana i generalnom sekretarkom IPC-a, međunarodne multilateralne organizacije koja okuplja parlamentarce na globalnom nivou s ciljem zajedničkog rješavanja problema koji neizbježno utiču na cijelo čovječanstvo, razgovaralo se o uspostavljanju aktivne saradnje IPC-a s Parlamentarnom skupštinom BiH, kao i o učešću predstavnika Parlamentarne skupštine BiH u radu IPC-a. Tokom susreta dogovorena je i saradnja Parlamentarne skupštine BiH s IPC-om u oblastima jačanja globalnog mira, ekonomske saradnje i zaštite okoliša.

Poslanik u PDPSBiH Nihad Omerović održao je također sastanak s članovima Grupe prijateljstva Parlamenta Azerbejdžana za Bosnu i Hercegovinu, koje je predvodio predsjedavajući Grupe prijateljstva Mazahir Javid Efendiyev. Tokom sastanka, kojem su prisustvovali i članovi Grupe prijateljstva Parlamenta Azerbejdžana za Bosnu i Hercegovinu Jabi Huseyn Guliyev, Mushfig Jafar Jafarov i Musa Jafar Gasimli, konstatirano je da su odnosi između dvije zemlje izuzetno prijateljski, što, kako je rečeno, otvara široke

mogućnosti za unapređenje ekonomske saradnje, posebno u oblastima energetike, poljoprivrede i turizma. U fokusu razgovora bilo je i intenziviranje međuparlamentarne i međuvladine saradnje, te ubrzanje aktivnosti na potpisivanju i ratificiranju svih pripremljenih međudržavnih sporazuma. U vezi s tim, dogovoreno je da će državni parlamentarci učiniti sve kako bi se ubrzale i aktivnosti na otvaranju ambasade Bosne i Hercegovine u Bakuu, što bi dodatno unaprijedilo odnose dvije prijateljske države.

Izveštaj pripremila

Amila Kličić
Amila Kličić
Stručna savjetnica – prevoditeljica
za engleski jezik

Izveštaj odobrio

Nihad Omerović

Nihad Omerović
Poslanik u Predstavničkom domu
Parlamentarne skupštine BiH

Dostaviti:

- naslovu
- Kolegiju Sekretarijata PSBiH
- Komisiji za vanjske poslove PDPSBiH
- Sektoru za odnose s javnošću
- a/a